



Komunikadu Imprensa
Parlamentu Nasionál
01 Agostu 2017

JSMP pesimista prolongamentu ba periódu normal parlamentu nian sei rezolve esbosu lei pendente sira

Parlamentu Nasionál (PN) liuhosi plenária iha Segunda-Feira, 31 Jullu 2017, halo aprovasaun ho votus afavor 43, kontra 0 no abstensaun 1 ba Projeitu Deliberasaun Nú. 26/III (5⁰) kona-ba Prolongamentu Periódu Normal ba Funsionamentu Parlamentu Nasionál to'o 18 Agostu 2017. Prolongamentu ne'e propoin ho razaun atu bele finaliza esbosu lei sira ne'ebé agora dadauk iha prosesu aprovasaun finál globál.

Iha diskusaun ba projeitu ne'e, deputadu sira hotu konkorda ho prolongamentu tempu ba mandatu deputadu sira nian ne'ebé tuir loloos termina ona iha 31 Jullu 2017 ne'e. Maibé tanba iha razaun atu aselera aprovasaun ba esbosu lei sira ne'ebé iha ona faze diskusaun no aprovasaun finál globál tanba ne'e mak prolonga hodi finaliza lei sira ne'e antes tama lejislatura foun.

“JSMP lahetan konviksaun ida katak ho prolongamentu ne'e bele rezolve lei pendentes sira ne'e iha periódu semana rua nia-laran se la iha vontade no komitmentu politiku hosi deputadu sira. Satán deputadu balun ne'ebé naran la iha ona lista atu fila fali ba PN hahú aruma ona sira nia sasan no la ativu ona iha PN,” dehan Luis de Oliveria Sampaio, Diretór Ezekutivu JSMP.

JSMP observa durante ne'e kuaze fulan ida resin funsionamentu regulár no atividade sira iha plenária no Komisaun Permanente sira kuaze paradu totál sein iha justifikasaun ruma kompara ho órgaun soberania sira seluk nia servisu ne'ebé funsiona ho diak.

JSMP preukupa tanba PN nu'udar orgaun soberanu ida-ne'ebé representa povu, abandona servisu durante fulan ida resin ne'e hahú iha 22 Juñu-31 Jullu 2017 sein ajusta ho mekanismu proprio atu asegura funsionamentu PN nian hanesan normal. Enkuantu orgaun no instituisaun publiku sira seluk kontinua funsiona normal mesmu sira ninia membru balun partisipa iha atividade kampaña ba eleisaun parlamentár. Iha kazu ne'e, membru governu sira tenke apresenta pedidu lisensa sein vensimentu wainhira partispa ativu iha kampaña eleisaun ne'e.

JSMP kumpriende katak deputadu sira iha responsabilidade ba sira ninia partidu ida-idak atu partisipa iha kampaña eleisaun parlamentár, maibe deputadu sira tenke konsiente katak sira nu'udar deputadu ativu ne'ebé tenke asumi sira nia responsabilidade to'o sira nia mandatu remata no asegura funsionamentu regular PN nian. Prátika ne'e bele interpreta nu'udar aktu inkonsiderasaun ba povu nia konfiansa ne'ebé povu depozita ba deputatu sira durante sira nia

mandatu. Situasaan ne'e fó nia impaktu signifíkativu ba iha esbosu lei sai pendiente no labele diskuti antes sira nia mandatu remata.

JSMP apela ba deputadu sira bele diskute no aprova lei sira hotu, tanba ne'e husu ba meja Parlamentu Nasionál no Xefi Bankada Parlamentár sira atu bele fó prioridade no aumenta agenda plenária extra-ordinariu ida ne'ebé fokus deit atu diskuti no aprova esbosu lei sira ne'ebé iha ona faze diskusaun no votasaun finál globál nian ho nune'e bele finaliza antes deputadu sira nia mandatu termina.

JSMP espera katak deputadu sira lejislatura foun mai ne'e sei kumpri regras rejimentu PN atu la repete tan aktu (falta) ida ne'e iha tempu tuirmai hodi nune'e bele finaliza servisu tuir tempu ne'ebé termina molok sira nia mandatu remata.

JSMP mós haree katak iha parlamentu sei iha esbosu lei barak mak sei pendiente no iha possibilidade boot atu kaduka. Ne'e inklui Esbosu Lei Anti Korrupsaun, Alterasaun ba Estabelese Estatutu Remuneratóriu ba Majistradu Judisiál, Majistradu Ministériu Públiku no Ajente sira Defensoria Públika, Lei Órden do Advogadu, Lei Poder Lokal, Lei Eléisaun Munisípal no Lei Protesaun ba Labarik.

Atu hetan informasaun kle'an favór kontaktu:

Luis de Oliveira Sampaio
Diretór Ezekutivu JSMP
Email: luis@jsmp.tl